

四庫全書薈要·乾隆御覽本

集部

御定歷代賦彙卷二十八

地理

溫泉賦

有序

漢張衡

陽春之月百草萋萋余在遠行顧望有懷遂適驪山觀  
溫泉浴神井風中巒壯厥類之獨美思在化之所原感  
洪澤之普施乃為賦云

覽中域之珍怪無斯水之神靈控湯谷於瀛洲兮濯日

月乎中營蔭高山之北埏處幽并以閒清於是殊方跋  
涉駿奔來臻士女暉其鱗萃紛雜皆其如烟亂曰天地  
之德莫若生兮帝育烝民資厥成兮六氣淫錯有疾癘  
兮溫泉汨焉以流穢兮蠲除苛慝服中正兮熙哉帝載  
保性命兮

湯泉賦

宋 秦觀

大江之濱東城之野有泉出焉直回峰負深谷分埒引  
源迤邐相屬晨夜有聲涵雲注玉薄為虎鬚泆為魚目

鱗介莫潛遇者斯浴此何水也哉野老告余曰泓泓涓涓莫虞歲年不火而煥其名湯泉嗚呼豈非熒惑莅於上邪燭龍隱於中邪旁通咸池日御之所經邪幽精沉魄陰償其負邪丹砂黃硫金石之氣酷悍之所激邪德有常仁惠公而決寒凝海兮不冰旱焦山兮不竭其或燥濕外干精氣散越膚萃瘡瘍憊筋淫血欣滯汨之暫游恍幽憂之永脫以沐則髮澤以頽則齒潔其支流旁浸捐棄於溝壑者猶能灌蔬稻之畦已平原之暘沾溉

何其廣邪吾聞天下之水厥類實繁至於弱水儲陰投羽必沉火井萃陽爛石灼金祥標醴泉病飲而瘳異紀滋穴神瀼以流焦溪之胃蔓之飾沸潭謝聳聆之游其餘酒墨所發膠鹽是滋啜懷千金飲狂一國哀玉乳以中涵橫金絲而徑度詭品繆名紛莫為數咸受命於元精亦各私其所遇若夫匡廬汝水之旁尉氏驪山之下煙菲掩縟王孫鳥隼之所娛金穴椒房專寵靡曼之所占則湯泉之中又有顯晦者焉野老忻然而笑曰善乎

齊給之士曳杖而去行歌於塗曰淠淠滂沱奮此泉兮  
被彼山阿吾唯盥沐予不知其他

神泉賦

有序

晉傅咸

余所居庭前有涌泉在夏則冷涉冬而溫溫則水物冬  
生冷則冰可以過每夏遊之不知歲之有暑耳

惟茲神泉厥理難原在冬則溫既夏而寒混混洋洋載  
清載瀾遂乃壇以文石樹之柳杞密葉雲覆重陰蔽沁  
氣泠泠以含涼風肅肅而恒起於時朱明紀運旭日馳

光鬱鬱隆暑赫赫太陽盪玉體於寒波身淒焉而自清  
不知天時之有暑忽謂繁霜之墮庭逮至旻秋既逝司  
寒騁節六合蕭條嚴風凜冽河洛輟流太陰凝結彼澹  
澹而含凍此灼灼而含熱綠竹猗猗蒼藻青青是託斯  
茂是植斯榮

靈泉賦

唐李德裕

予林居西嶺平壤出泉廣不逾尋而深則盈尺自東鄰  
故丞相崔公至谷口故丞相司徒李公凡別墅五六皆

謂之平泉實發源於此觀其涌不騰沸淡然冽清冬溫  
夏寒明媚可鑒其靈泉之蘊也予往歲獲戾放逐再罹  
謗傷泉必變色久而後復昔傳長虞庭有涌泉以其色  
在夏則冷涉冬而溫乃為神泉賦况潛靈蘊異美過神  
泉因效長虞所作偶成此賦

山下出泉厥壤非石隨淺深而見底實秋毫之可析其  
瑩若纖埃之映琉璃微蟲之潛琥珀玉瑕瑜而不掩鏡  
妍媸而盡覲且夫動則廣大止則虛明如君子之抱德



乃望表而見情發源而東百谷皆盈既處高而就下雖  
遇坎而亦平曩者方騁康衢俄驚覆轍泉色暫晦合晶  
不發又如塵掩懸黎霧昏秋月累夕而翳盈旬乃散爾  
其脈引清泚環匝荆扉淪連寫照物色殊暉孕蘋藻為  
瑤碧涵沙磔為珠璣歷長坂而璘爛度小山而雪披若  
乃砥石於宇析波自島入虛白而逶迤浮縹清而繚繞  
氣潤蘅蘭色滋松篠含逸響於桐林動孤光於溪鳥於  
是列植芳菊華豔芊絲清漪瀾而更馥搖霽景而相鮮

葉凝夕露叢靄秋煙美楚人之餐英慕胡公之飲泉况  
復自亭徂溪賞緣數里懸瀑溜於碧潭散浮湍於清沚  
乘鷁舳以晨泛聽菱歌而夜起見兼葭之始香疑相沅  
之在此重曰原濕既平泉流既清三逕未荒萬木向榮  
感棣華之零落愴時鳥之相鳴恐閱水乎日逝且歸來  
兮養生

蒙泉賦

唐  
李程

蒙彼東山山下有泉運未逢於畎澮色空積於澄鮮虛

明可鑒澹泞自然宜習坎以為德胡止艮而莫前士有  
酌而歎曰惟水之義萬物之利顧導達之或闕將灌注  
而奚遂朝宗路阻未歸朝夕之池潤下功微空浸尋常  
之地且夫壅則止理則通能致遠邇任決西東荷四氣  
之平均潛生麗藻處重陰而蒙蔽尚隔清風亦有舒女  
化而稱異耿恭感而成功彼皆因人而有託此獨居然  
而在蒙懿其滿而不盈卑以自處岷山未測且觀濫觴  
之時滄浪是期終異濯纓之所性則全柔德無與儔能

載清而載濁諒可泳而可游將注江湖終有希於上善  
未分涇渭誠無惡於下流嗟止水之奚匹念發源兮在  
斯當其一勺而可挹豈待成川而後知儻理水之有便  
諒餘波而可期他日敢以勝載之力冀禪舟楫之時

雙瀟泉賦

以泉澄水澈皎  
鏡春冬為韻

唐王潭

呀厚地而濫涌者有河東之瀟泉拆陰開竇沃日浮天  
初汨沒圓衝拂高湍於柔祇之下復逶迤遠注散餘波  
於馮夷之川為神龍窟宅之上而致美為陰陽蓄洩之

所而通玄將海日泓泓而昭此宜坤儀挺拔以墮馬來  
何所以去何所止始開雙瀟發輝於汾魏之郊竟助洪  
流歸潮於渤澥之水借如夜色初升空光下凝繁星映  
而珠滿新月入而鈎澄泊乎風駭霧勃煙涌雲蒸則有  
鬼神倏閃以恍惚蛟螭鼓怒以噴騰異物之與詭怪孰  
可得而備徵意以為潛虛洞決脈流派別雖一河有隔  
終陰隲以相連故數眼分開涵碧虛而共潔是以百尺  
澄兮四空晶珠胎明兮沙岸皎洗拂煙埃蕩漾魚鳥亦

能涼生朱夏氣暖玄冬守謙下以含道順畎澮以利農  
道則以物為賓水則假利於春人有情於利水水無意  
以求人人之自偽我豈非真故至人以水為德以心為  
鏡鏡雖明不利於人故溝之為澤也廣泉之為鑿也淨  
若壅而閉則澤不能及物混而濁則鑿不能自正故選  
士者象清溝以含虛懷才者但明心而未映苟能酌憲  
於茲泉則可以相鹽梅而翼聖

娥女泉賦 有序

唐  
李蒙

泉在寧陽城南二里古老傳稱娥女美容色善歌舞度  
曲此地化為泉生於巖石間垂灑如淚故云耳

水之裔巖之偏變彼娥女劉為沉泉伊昔巧笑淑靈濃  
華豔色頰脣發而寥亮素袖盤而掩抑故能傾北方掩  
南國超俗絕世神窮化極於是淒兮雨濕黯兮雲沉銷  
玉貌與紈質冶瓊姿及蕙心舞成水態歌入流音臉眇  
眇以波盡眷娟娟而月深觀其岸草翠積崖苔綺映列  
山光以汎豔懸樹色而涵靜引耀冰玉貞明石鏡能含

上善之心不改至柔之性若乃蠲祀典戒良辰蘋藻前  
奠笙竽下陳莫不淋漓玉集滴瀝珠新聲嗚咽而成韻  
淚闌干而向人及夫嚴風歲晚熾景炎節水杜河沉流  
枯海絕則必濕溜冬汎寒光夏冽異黃泉之下冥殊遊  
水之東閭噫化將云盡奚假物而獨靈道或既存雖得  
仁而何懟靡度可持安知榮悴望神光兮水潛鑿化跡  
兮山閔塞杜若以誰與弄潺湲而增思

舒姑泉賦

以記云舒氏女  
化為泉為韻

唐

浩虛舟



漂水之上蓋山之前昔有處女化為澄泉瞻風而艷色  
如在責實而寒流宛然原夫曠別幽室暗悲韶年顧容  
華之莫守望世人而都捐儼弱質以徐來顏猶灼灼委  
貞姿而色動聲已涓涓眷戀無心淒涼故地念嬋娟之  
可惜驚變化而殊異俯視清流託誠幽意陳翫習而斯  
在度精魂之能記素鱗頰尾渾非舊日之容急管繁絃  
徒盡平生之志既而水府潛處幽冥既分凝情而淑歛  
寒色冶態而波生細文泛浮影於中流遙疑嫋嫋逗鳴

湍於別派遠若云云由是鱗甲與遊綺羅長阻迷綠沼  
之迴復忘紅樓之處所源通相渚寫幽恨於靈妃流達

漢皋導春心於游女淨色含虛清輝皎如煙凝淚以香  
起苔爛斑而錦舒浦水光搖似動橫波之末岸莎風靡  
如存鬢髮之餘想夫紈質已銷陰靈未謝濯衣彩於花  
書洗鏡光於月夜泠泠不濁殊畫地而俄成滴滴無窮  
類拜井而潛化且靜而清者水之宜柔而順者女之為  
憶朱顏之婉婉柔碧溜之逶迤浮沫粉聚懸流淚垂泛

萍藻而翠翹零落動菰蒲而綠帶參差及夫亂草丰茸  
古墟荒毀雜泥沙之汨沒蔽音容之妖靡至今閭里之  
人空傳其名氏

廬山雲液泉賦

有序

唐 吳筠

筠所居之東嶺其側有泉洪纖如指冬夏若一山少凡  
石至多雲母其水色白味甘且滑此則雲母滋液所致  
因名雲液之泉乃結宇其旁引於軒廡之下既飲既漱  
永翫無斁今茲夏季不雨至於十月江湖耗井澗涸此

泉泠泠不減乎昔懿其若是爰以作賦

坤元孕氣潛暢成泉冠五行之首為萬物之先爰有清  
泚出此山側處蒙險以難知猶井渫之不食我搜靈泌  
載披載登見其地僻至潔源深有恒凝寒不為之損暑  
雨不為之增乃考室以飲而樂在枕肱甘侔玄玉之膏  
滴乃雲華之液疾可蠲生可益引充狎翫惟意所適懸  
之則素皎壅之則澄碧晝浮光以悠揚夜含響以淅瀝  
陰陽為災水旱失節不雨炎夏暨乎玄月汪汪洪波久

已竭耿耿瀑布今已絕挫江湖之浩蕩沉澗谷之微劣  
斯泉秉彝毫纖無虧雖遠不霑惠而近有所滋彼潮需  
於疇昔豈不慙涓涓於此時夫醴泉無源而易涸丹溜  
乍見而難挹曷若止以為鑿酌焉取給何異神仙之漢  
帝臺之漿涌異域之表湛無人之鄉茲亦標竒於絕境  
真可謂靈而長者也

望瀑泉賦

唐  
李華

曙無雲兮川無波泛余舟於空碧彼廬山浮重湖之上

兮我極天之峻壁凝黛色之深明噫林嶺之岑寂何神  
造之杳冥躍騰泉於山脊孤流皎皎於蒼梁翠涼千仞  
兮懸帛玉繩維於寥天銀河垂於廣澤春風雷兮篋霜  
雪穿重雲而下射白龍倒飲於平湖若天地之初闢委  
滔滔兮東逸詎知夫維今之在昔何倚高帆而一望豁  
余心兮灑滌近古有鴈門上德兮昭洗塵昏柴桑間士  
兮含印推尊靈境殊象詮微究原人已古兮山在泉無  
心兮道存將默貫於精極欲置之而不言

雙瀑賦

宋

王十朋

王子游簫峰之下訪鼻祖於仙籍駐杖屨於金溪觀雙瀑之千尺於時驟雨初歇飄風迅擊飛泉洶涌怒流湍激噴煙霧於蒼嵐吼龍虎於大澤百川震而澎湃萬類紛其辟易疑若傾崖轉壑變丘谷而為陵又類萬馬千丘奏鼓聲而赴敵久之狂潦微殺巨流順適靈源復尋於故道雙派交馳於絕巖勢偶殊而卒合路雖分而稍迫玉箸垂兮拂輕寒長紳拖兮蘸深碧疑若鯨鯢鬪怒

兮力未決而方酣干鏖爭鋒子光交騰而互射嗟夫匠  
之施巧兮作勝事於泉石顧一派之罕有兮豈雙流之  
易得不見夫銀河落於半天兮破廬阜之山色梅雨飛  
於石門兮敞芝田之靈蹟潭千丈於石橋兮渺仙凡之  
路隔龍兩秋於鴈蕩兮分大小而異宅彼獨溜而孤飛  
兮猶擅名於今昔况並峙而爭流兮作人間之連壁吾  
欲窮千里之源兮問化工之始闢思漢使之不復見兮  
悵靈槎之難覓獨終日而登臨兮寄吾懷於幽寂與雖



盡而忘歸兮猶待乎風清而月白於是目瞬飛流之末  
耳洗寒潭之側思往事之微茫仰遺風而歎息竈中煙  
冷難尋入竹之人峰頂臺荒不見吹簫之客賦罷乃歌  
而歸曰雙瀑之水從何來靈源千尺高崔嵬飛流噴沫  
飄瓊瑰空山落日鳴春雷有客來游獨徘徊枕流漱石  
興悠哉塵襟濯罷飄然回風清月白空簫臺

天慶觀乳泉賦

宋蘇軾

陰陽之相化天一為水六者其壯而一其穉也夫物老

死於坤而萌芽於復故水者物之終始也意水之在人也如山川之蓄雲草木之含滋漠然無形而為往來之氣也為氣者水之生而有形者其死也死者鹹而生者甘甘者能往能來而鹹者一出而不復返此陰陽之理也吾何以知之蓋嘗求之於身而得其說凡水之在人者為汗為涕為涕為淚為血為洩為淚為涎為沫此數者皆水之去人而外驚然後肇形於有物皆鹹而不能返故鹹者九而甘者一一者何也唯華池之真液下涌於舌

辰而上流於牙頰甘而不壞白而不濁宜古之仙者以是為金丹之祖長生不死之藥也今夫水之在天地之間者下則為江湖井泉上則為雨露霜雪皆同一味之甘是以變化往來有逝而無竭故海洲之泉必甘而海雲之雨不鹹者如涇渭之不相亂河濟之不相涉也若夫四海之水與凡出鹽之泉皆天地之死氣也故能殺而不能生能槁而不能浹也豈不然哉吾謫居儋耳卜築城南鄰於司命之宮百井皆鹹而醪醴潼乳獨發於

宮中給吾飲食酒茗之用蓋沛然而無窮吾嘗中夜而起挈餅而東有落月之相隨無一人而我同汲者未動夜氣方歸鏘瓊珮之落谷澹玉池之生肥吾三燕而過返懼守神之訶譏却五味以謝六塵悟一真而失百非信飛仙之有藥中無主而何依渺松喬之安在猶想像於庶幾

後乳泉賦

有序

宋  
李綱

玉局翁作乳泉賦妙語雄辯不可跂及然理有未安者

梁谿翁作後賦以訂之其辭曰

客謂李子曰蘇子之賦乳泉也其言曰為氣者水之生而有形者水之死也死者鹹而生者甘甘者能往能來而鹹者一出而不復反也其果是也其果非也邪李子曰蘇子逞其辯說之雄詞語之工而有是言也揆之以理蓋似是而實不然也客曰願先生賦之李子曰唯唯盈天地之間為萬物五行最鉅而水其先也散而為氣者水之化聚而有形者水之體也其源必甘者水之本

其委必鹹者水之末也凝為霜雪噓為雲霧結為霰雹  
融為雨露凡水之氣升於天者茲非其化邪發為井泉  
匯為沼沚流為川瀆鍾為湖海凡水之形比於地者茲  
非其體邪江河淮濟井谷之泉凡水之源未嘗不甘者  
茲非其本邪滄溟之波斥鹵之地凡水之委未嘗不鹹  
者茲非其末邪箕子之陳洪範論水之性水曰潤下自  
其體言之也論水之味潤下作鹹自其末言之也因體  
兆化則形可以變而為氣故水之升則為雲而雲之降

則為雨是氣形之初無二理也由末歸本則鹹可以復而為甘故海洲之泉必甘而海雲之雨不鹹是甘鹹之初無二味也請觀諸身水之在人為血血有形也流於榮觀則為氣血至鹹也發於潼乳則為甘至於涕唾涎沫亦然漱而鍊之氣灌五臟甘而不鹹由是言之蘇子以有形為水之死而以鹹為死之味一出而不復返也豈不過歟夫木無味也其末為實味斯酸矣火無味也其末為焦味斯苦矣土無味也末為稼穡味斯甘矣物

成然後有味而末者其所以成也五行之理莫不皆然  
何獨於水而疑之也客曰鹹者水之末而非其死則吾  
既得聞命矣敢問泉源若一而味有獨甘者何哉李子  
曰五行相生以金生水物得所生其出乃美故甚甘之  
泉洞穴之下必有金錫以養之腐敗之井欲變其味必  
資金錫以鎮之物理之自然也我卜我居梁谿之濱陸  
子之泉天下所珍甘若牛乳錫山是鄰烹茶則芳釀酒  
則醇可以佚老可以娛賓挈榼操杯酌冷嘗新繞齒頰



之清甘滌肺腑之埃塵析醒愈病益壽延年爰撫松而  
嘯月遂拂石而眠雲優哉游哉飲水曲肱而枕之可以  
養愚拙而全吾真

石門泉賦

有序

明 郭 棊

夫君子矯時獨立斯能挽頽風而歸諸正昔周武王孟  
津之師諸侯從者八百獨夷齊扣馬恥食周粟子輿氏  
稱為聖之清足以廉頑立懦斯非獨立一時者與吳隱  
之處默生晉之季時尚清談而行多穢蟻處默為廣州

刺史酌貪泉以詠志卒之沉香於浦不易其操指盧循  
劉裕為盜為篡歸而杜門甘貧不出屹然顏波之表真  
不媿夷齊矣蓋夷齊憂萬世無君處默憂萬世無臣所  
感不同其清忠不二則一也處默酌泉杜門之心即夷  
齊不食周粟之心與然則謂處默為晉之夷齊可也予  
乙未夏自滇南歸伏謁祠下時鄉士夫繕公祠新成少  
參袁茂文業記之闡揚清節關於風教甚大予復表不  
事二姓之心而賦焉

繫兩山之帶嶠子挺粵嶠之門屏傍有泉之涓涓兮噴  
碧流之泠泠何昔人之孟浪子羌汨之以汙名曰一畝  
而懷千金子豈知其源之深而清猗處默之瓌璋而卓  
犖兮抒淵衷於題詠爰大勺以引滿兮豈云遽移於吾  
性維太一之濔濔兮掀朗照之如鏡詎波蕩之能洄兮  
乃天君之素定嗟典午之不綱兮腥羶穢乎華夏紛指  
駿以為鹿兮漫以牛而易馬詫嶺海之遐裔兮金夫張  
而廉貞喑啞瀦流泉之在茲兮冒貪名而長夜噫吾心

之賦於天子本至虛而至靈涵萬象而弗遺兮秉一介  
以為貞豈因世之溷濁兮而能易吾之清明乃命酌以  
自信兮洗茲泉之污聲時荻龍之弗憊兮挺戈鋌而作  
孽焜臣東於皎日兮唯矢貞而抗節哂么麼之匪茹兮  
肆并逢豈毒螫飲茲泉以自葆兮諒丹心之不易赫赫  
堂之榮名兮傳不滋夫鐘鼎惟公志之澹泊兮僅一魚  
而一茗即片香亦必沉兮汎桃花而晻映亮孤節之亭  
亭兮超塵氛而守正晚退居於丘樊兮慨皇祚之凌夷

榮惑見於東井兮彗星埽於紫微  
嗤太尉之跋扈兮歎世塗之嶮巇  
竟憂憤以易箚兮終全身於義熙  
偉亮節之磊落兮稱純臣其庶幾世  
皆知公酌泉之清兮而不知殉國之  
節甘鶯犬之艱貞兮蹈猶龍之截  
棄不委身於二姓兮媿夷齊之孤烈  
唯不易於一心兮足蜚聲於萬葉  
亂曰人臣之職兮清以成忠惟夷與  
齊兮百世可風美哉處默子良二千  
石一酌流泉兮萬古為烈  
鬱彼孤貞兮不事二姓  
憂憤以沒兮為臣之正  
粵山龍從于

粵泉泚冷先生之風兮山高泉清

游懸泉賦

金趙秉文

庚午之歲九月既望趙子與客游於承天之廢闕置酒  
乎妒女祠之側千山暮蒼素月如拭形與影嬉山谷互  
答一談一笑超然自得既而歎曰泉下飛則無聲石不  
聳則無骨山日秋而漸瘦境以夜而增寂四者備矣而  
無勝因以文之境雖竒而不即於是剝蛇腹之枝以為  
琴竅鳳膺之管以為笛誦王摩詰韋蘇州之詩所以侑

此觴而永今夕少焉動乎動息乎息嗚乎嗚嘿乎嘿入  
吾耳者瀏以清歷吾目者森以屹金鼓半空聲在峽中  
道孃子之關潘美所以下河東者邪旗幟盡拔春染木  
末突井陘之口韓信所以破趙壁者邪迫而察之風落  
山而泉鳴石也二客曰未也向者泉出祠下大如車輪  
下赴絕澗懸流千尺殷晴空之雷霆飛炎天之冰雪六  
年於茲而閱其澤子能酬而出之亦一段之奇特趙子  
曰泉有時而通亦有時而塞豈我見聞有我同源動靜

致一反聞聞處聞所不及無聞之聞聞性不絕離見見處見亦不立無見之見見亦不滅今子以耳聽聲未能眼處聞聲以眼觀色未能耳處觀色故一泉之見為之感也歸語同僚曰此殆維摩詰也覺而賦之但山高水深風清月白

觀泉賦

明邵寶

維暮春者二泉子步自廬麓觀泉於龍池况觀而憩於是賦之夫龍池之上中峰凌霄雙泉下垂名曰瀑布若



颺若颺若奔若馳浸星綴漢破雲截霓孰從而速孰阻  
而遲此天下之至奇也及其中也迴澗轉谷放乎至足  
强弩釋機輕車旋轂鯨舞於潮龍戰於陸千雷萬霆神  
藏鬼伏蓋吾聞諸古人至是而得寓目焉又其下也石  
壁四立淵淵其潭其廣可度而深不可探納之匯之其  
量有涵澄之而清酌之而甘清不可藜甘不可婪乃溢  
而流行徐百折陰洞之竇陽厓之缺逶逶迤迤滔滔決  
決吾嘗見其行而未見其輟也乃若日星開朗動盪

精玉作之色金作之聲載歌滄浪以舒幽情厥或霧雨  
晦蒙呼吸變化沉鬱而洩叫號怒罵大資經綸小入圖  
畫一日之內四時之中東西南北隨觀異容發太極祕  
妙地天通詰之莫辨測之莫窮非川上翁其將焉從邪  
山僧執筆請書於石子何言哉一笑而擲

觀泉賦

明倪謙

當春日之載陽兮柳裊裊以垂絲暢冲襟以抒寫予涉  
層臺而自怡雲冉冉其出岫兮風飄飄而吹衣瞻翠巖

之石罅兮縣瀑颯其雙馳恍銀河之倒瀉兮訝玉龍之  
競飛神巫忽焉飛越予人世杳然以如遺慨古今之禪  
代兮少日壯而老以衰惟茲流之噴薄兮亘四時而不  
移嗟人生其如寄兮徒擾擾將何為傷余懷以興感兮  
足踟躕其志歸

品惠泉賦有序

明 徐獻忠

叔皮何子遠遊來歸汲惠山泉一罍遺予東臯之上予  
方靜掩竹門悄詳鶴夢竒事忽來逸興橫發乃乞新火

煮而品之使童子歸謝叔皮焉

迺何子之特發探水穴於山椒挂清寒於齒牙訊老羽  
於惠察甘平雲之乳竇因起興於歌操望徐子以馳神  
出簡書於下曹侑以陽羨之珍穀雨之苗走竒芬於鼻  
觀參春靈之上苞合二美於一旦嘉上善之無嘲如上  
客兮在門赴靈修之久要發空濛之玄閔辟塵氛於有  
巢爾則陶氏之鼎改餘之火既精滌盪遂集文武瀉玉  
液於懸崖分小瀑之如布忽變紺寒蒸氣如霧覺蟹眼

之旋生復中起兮如破涌江潮於剎石沸温波於洛浦  
於是歸功茗事頌德玄冥出太素於碧落浮瑤光於上  
清露華紛其秋澹佳氣鬱乎春明媚幽懷之無始眷高  
况兮凌雲游玄神於顧渚追勝事於南冷興咄咄兮七  
發心冉冉而獨醒劣山谷之雙井勝仙掌之金莖奔走  
羣公道遙竹門品上池之獨重追菊水於頽齡信馳心  
於空灝無乃下甘露而清洪河也

濛汜池賦

晉  
張載

麗華池之堪澹開重壤以停源激通渠於千金承漑洛  
之長川挹洪流之汪濊包素瀨之寒泉既乃北通醴泉  
東入紫宮左面九市右帶閭風周墉建乎其表洋波迴  
乎其中幽瀆傍集潛流獨注仰承河漢吐納雲霧緣以  
采石植以嘉樹水禽育而萬品珍魚產而無數蒼苔汎  
濫修條無幹綠葉覆水玄陰夾岸紅蓮煒而秀出繁葩  
葩以煥爛遊龍躍翼而上征翔鳳因儀而下觀想白日  
之納光覩洪暉之皓盱於是天子乘玉輦時遨遊排金

門出千秋造綠池鏡清流翳華蓋以逍遙攬魚釣之所  
收纖緒挂而鱸鮓來芳餌沉而鯉鯉浮豔夥踰於巨壑  
信可樂以忘憂

小池賦有序

唐太宗

許敬宗家有小池作賦賜之

若夫素秋開律碧沼凝光引涇渭之餘潤紫蕊尺之方  
塘竹分叢而合響草異色而同芳徘徊躑躅淹留自足  
疊風紋于連復連折迴流兮曲復曲映垂蘭而轉翠翻

輕苔而動綠牽狹鏡分數尋泛芥舟而已沉涌菱花於  
岸腹劈蓮影於波心減微涓而頓淺足一滴而還深於  
時景落池濱霧黯疎筠卷舒澄霞彩高低碎月輪露宿  
鳥之全翮隱游魚之半鱗岸隨年而或故流與日而終  
新雖有慙於溟渤亦足瑩乎心神

小池賦應詔

唐

許敬宗

臣忝班下列胥宇上京欣託巢之有庇體堦戶之全生  
爰鑿小池依於勝地引八川之餘滴通三涇之洋泌慕



鑿止而端形乃游智而清志爾其潺湲繞砌激沒紫除  
擬高陽而不足比蹄涔而有餘游瑩劍之微鳥躍露鼎  
之纖魚乃若倚并傍通桃蹊俯映仰天津兮共澹潔秋  
景兮俱淨倒列宿以疑珠含望舒而似鏡覩江使之潛  
處翫波臣之沉詠於是翻光甕牖漾影蓬門溜激石兮  
長嘯鳧鼓浪兮相喧竹凝露而全弱荷因風而半翻足  
以漂瑩心神澄清耳目對昆明而取况喻春蘭與秋菊  
不羨寶於河宗宜希大於暘谷彼瑤池之高醮固幽遠

而空傳此坳堂之信遠遂騰譽而聞天降臨渭之睿藻  
連橫汾之曩篇何微生之一日荷大賚於千年

清冷池賦

唐王冷然

梁王既受封於漢命駕東游入睢陽之下國弔微子之  
高丘榮華莫比僭擬無休復欲象昆明之校戰同右武  
之習流決河間而飲馬治宮樹以維舟當時舊跡此地  
爰修土木間成起臺宮而似畫絲金並奏和永石而疑  
秋是時宮人出看上客淹留既成此地勝形無比喬樹

青冥而外合層巖岌業而斜指曉坐狎鷗春詞薦縹連  
小山而夾迴磴截長河而分半水徒觀其清冷無點洞  
澈如凝鏡開珠淨月滉星澄鳧嚼紅藻龜翻碧菱地將  
昏而霧合天欲雨而雲蒸明則可鑒虛而不竭風靜浪  
碎日落圓折波含閣而相動潭映空而俱澈此土之池  
君王所為年深則峴山陵變水決則滄海塵吹不見射  
魚之浦空餘養鴈之陂皇家化溢成周包含梁宋分星  
辰以主萬國會江漢而歸一統惟茲之地清而且平居

下流而不濁含上善而逾明常以柔而處順宜遺道而  
從榮時人競渡搖海艦於三春暮客來投落江帆於四  
岸何今日之登陟皆昔年之池館物是人非所存者半  
濟巨川必待舟楫得風流還升汗漫儻餘波而可需幸  
不遺有所觀

漲昆明池賦

以池滿春流思  
象河漢為韻

唐張仲素

空闊靈沼蒼茫舊規昔穿鳥迎秋而大閱戎艦今漲也  
乘春而無竭陂池惟時陽候既序陰冰已泮天子乃詔

京尹以亢役命水工而叶贊陳衆力而雲鍤勃興決萬  
派而箭流共灌澹汪汪之積水似耿耿之斜漢况復穀  
雨初霽天桃正春總上善以利物涵聖澤之深仁軼彼  
宮沼瀾如海濱鼓金隄之曲岸揚石鯨之彩鱗浪涌煙  
郊更失辨牛之淡日華翠澈纒分織女之津伊昔殊荒  
未化勤遠是思非障澤之溘矣將水戰而肆之構館浮  
鷁以遨以嬉獮獺呈形有類於文身之俗鳧鷖亂響如  
習乎下瀨之師春水平兮波潏春日煦兮沙暖雖守柔

以易狎竟安卑而就滿重泉之沫騷騷而若迴淺沚之  
毛離離而漸短至若鏡朗風收澄明不流沃餘潤於荒  
野引孤光於釣舟豈獨鼈屨是獻寶亦龜龍載游厥跡  
既往前聞可想故人遙集曾分劫火之灰蕃帥來朝暗  
識滇河之象其漲則那式詠且歌開鄭白之墳行流畎  
澮以天波瑞氣長凝表宸居之在鎬晴虹乍飲若榮光  
之出河大哉水之為量皆從夫一勺之多

漲昆明池賦

唐  
宋 悛

於廓靈沼其流湯湯控清源於近甸澄積溜於方塘頃  
者天子時欲出池苑瞻農桑納獻可之規諫設成務之  
紀網乃斬祀抑破隄防將欲抑耳目之遊觀資稼穡於  
人康一物失所若已納隍竭其澤則龜魚無咸若之地  
害於物則邦家無好生之方豈以成功者不可以適變  
識道者克在乎順常乃天意怡豫人謀允臧不遠而復  
載濬其隍亦既具畚鍤亦既濬沼止將挹彼而注茲乃  
引流而激水總括趣絕見鯨波之大來委輸成深覺鳧

舟之漸起且池之盈矣亦云自瀕修軌躅雖聞於仍舊  
開汲引終期乎取新鱗介將枯而復躍草木咸滋而更  
春皇矣我后有如其仁懿乎哉仰對一水旁連九陌流  
惡有類於汾澮納汗顏同於川澤煙收霧斂混天色而  
波清秋霖霜晴浮月華而影白載育菱芡羣浮羽翮將  
飛有翼時棲太一之雲欲濟無梁幾滯壁池之客且流  
謙者聞於善下惡盈者誠於自滿儻從事於水鑒庶可  
形乎長短



曲江池賦

以城中人日同集池上為韻

唐王 綰

帝里佳境咸京舊池遠取曲江之號近侔靈沼之規東  
城之瑞日初昇深涵氣象南苑之光風纔起先動淪漪  
其地則複道東馳高亭北立旁吞杏圃以香滿前喻雲  
樓而影入嘉樹環繞珍禽霧集陽和稍近年年而春色  
先來追賞偏多處處之物華難及只如二月初晨沿堤  
草新鷺嘒而殘風裊霧魚躍而圓波蕩春是何玉勒金  
策雕軒繡輪合合杳杳殷殷鱗鱗翠亘千家之幄香凝

數里之塵公子王孫不羨蘭亭之會蛾眉蟬鬢遙疑洛  
浦之人是日也天子降鑾輿停彩仗呈九劍之雜伎間  
咸韶之妙唱帝澤旁流皇風曲暢固知軒后徒游赤水  
之渚何必穆王遠宴瑤臺之上復若九月新晴西風滿  
城於時嫩菊金色深泉鏡清浮北闕以光定寫南山而  
翠橫有日影雲影有鳧聲鴈聲懷碧海以欲垂釣望金  
門而思濯纓或策蹇以長愁臨川自歎或揚鞭而半醉  
繞岸閒行是日也樽俎羅星簪裾比櫛云重陽之賜宴

顧多士以咸秩上延良輔如臨鳳沼之時旁列羣公異  
在龍山之日若夫冬則祁寒裂地夏則晨景燒空恨良  
時之共隔惜幽致以誰同孰見其冰連岸白蓮照沙紅  
兼葭子葉葉凝雪楊柳分枝枝帶風豈無昆明而在乎  
畿內豈無太液而在乎宮中一則但畜龜龍之瑞一則  
猶傳戰伐之功曷若輪蹄輻湊貴賤雷同有以見西都  
之盛又以見上國之雄願千年兮萬歲長若此以無窮

鹽池賦

晉  
郭璞

水潤下以作鹹莫斯鹽之最靈傍峻岳以發源池茫爾  
而海渟嗟玄液之潛洞羌莫知其所生狀委蛇其若漢  
流漫漫以漭漭吁鑿鑿以粲粲色皜然而雪朗揚赤波  
之煥爛光盱盱以晃晃隆陽映而不焦洪濬沃而不長  
磊崔碌碓鏹刻碁方玉潤膏津雪白凌岡粲如散璽煥  
若布璋爛然漢明晃爾霞赤望之絳承即之雪積翠塗  
內映頰液外翳動而愈生損而滋益若乃煎海鑠泉或  
凍或漉所瞻不過一鄉所營不過鍾斛飴戎見珍於西

鄰火井擅奇乎巴濮豈若茲池之所產帶神邑之名嶽  
吸靈潤於河汾總膏液乎澮涑

鹽池賦

以天造靈物  
資人食為韻

唐閻伯興

坤之美兮焉可以測鹽之池  
漭沉兮劃開於郇瑕之側  
廓平陸而無際浸長天之一色  
前對條山照峰巒之巖  
崑却鄰安邑對城樓之窺  
及其出形鹽也狀雄虎之蹲  
於長野攬擎兮布護其吐精光也  
如白日之昇暘谷照  
爛兮燭葩既似乎鏡湖之不遠  
又似乎渤海之在即是

以我良牧宣風千里寒帷憑軾觀茲池兮荷上天之報  
觀茲鹽兮恤下人之食意者以為季布鎮乎股肱黃霸  
蘊其輔翊不爾何魚鹽川澤之用饒土潤鹹醎之利飭  
天人之繫列則有典有孚百姓之攸迷而不知不識粲  
矣郊甸丕哉庾億且觀其皎晶池濱皚峨嶙峋髣髴珪  
璧依稀硤珉入澤遐窺喜晴天之速曙隔林斜望訝瓊  
樹之驚春解之者若如膏之容捧之者疑獻玉之人况  
生殊播植動必合時為諸侯之賞愛入嘉賓之賦詩嗟

乎其皎皎于于川之渚其郁郁兮于川之坻有美玉之  
價沉之而不汚有君子之德澗之而不緇利入桓公之  
論名留謝氏之詩充郡國之珍產實亭育之攸資永言  
沉鬱必由光拂可取於人况鑒於物懿夫天不祕寶地  
不藏靈可以和梅羹之調鼎致君於堯舜可以偶牯鱗  
之入薦效祉於勳名爾河汾之寶信同天造豈若分溝  
塍之綺錯則萬頃花明市井田之周環則千里雪皓由  
斯言旃有美自天幸無委於泥淖將以報於陶甄

欽定四庫全書

新定歷代賦彙

卷二十一

三十一




御定歷代賦彙卷二十八

謹案卷二十八第二十七頁後四行若已納隍按

隍字韻複

欽定四庫全書





總校官庶吉士 臣張能照

校對官編修 臣楊壽楠

謄錄監生 臣熊輝

欽定四庫全書會要

集部

御定歷代職彙卷二十九

御定歷代賦彙卷二十九

地理

新潭賦

唐  
王泠然

新潭賦

天府名曰河南水有清洛漲乎新潭夫其貫都成  
川習坎為德石門呀豁而洞瀉綠樹逶迤而夾植源自  
山來漕因人力或清淺而見底或深沉而莫測奔狹口  
以雷聲積中心而黛色若乃方將暮春大集都人錦筵

橫石羅幕藉塵綺影攢臨變作桃花之浪衣香亂入翻  
為蓮葉之津由其地勢多美所以潭名永新觀其城闕  
映帶閭閻縈繞半向石崇之園斜經潘岳之沼星月沉  
浮乎其內煙雲洗拂乎其表不生芰荷但聚魚鳥通舳  
艫之利於國既多開浸灌之功與人非少自記從調恒  
來此遊朝林坐而疑夕夏潭行而覺秋清可照人實欣  
逢於朗鏡虛宜受物佇相引於仙舟帶洛常恥臨淄更  
羞况獲忝乎餘派終敢希乎下流

新潭賦

唐張環

惟國之左當河之南分逶迤之舊洛漲浩漾之新潭觀  
其沙石中映魚龍內涵泛危槎而獨隱紛衆水以相參  
原夫引派潛迴疏源洞出淙石門以雷注透金塘而箭  
疾暝浮天漢之雲晝洗嵎夷之日雖習坎之為常乃流  
謙而不溢若夫正月登晦韶風報春花明上巳柳暗長  
津出金埒之遊騎下瓊樓之美人愛清流之疊疊走香  
駕以鞞鞞樂此幽勝禊乎陽濱竭主第之羅幕盡侯家



之錦茵窺浴鳥之呼伴見飛魚之觸綸既靈長於上國  
恒見美於斯辰若夫黛色冲融清光晶了綠苔一點疑  
濯髮於江波青楊四周若連帷於漢沼湛珠彩於星夜  
流錦華於月曉苟形影之可觀乃妍蚩而必表歲蒼茫  
兮寒氣冽潭皎潔兮生堅冰比玉卮而逾淨對瓊華而  
更凝猶不若鏡室之為朗銓臺之可稱庶狂愚之可鑒  
知簡要而相承

秋潭賦

以秋氣清爽資  
彼澄澈為韻

唐

王起

汚彼積水凜乎高秋秋應律兮則勁水為潭兮至幽當  
草木之不芳獨開翠色因天地之始肅更變寒流匪騷  
人之詠歎實知者之娛遊爾其畜翕淪之色得蕭瑟之  
氣就其淺則疊疊共清臨其深則兢兢足畏居下流之  
可保信上善之為貴寂爾不動湛然恒平正衣冠而逾  
審燭毫髮而必呈性則納汙能積小以成大時方收潦  
故沿濁而更清鷗浪不振鷺濤不驚同至人之虛受比  
君子之持盈懿其歇昏霾羅物象峰巒之所攢列雲煙

之所來往媚潛虯之幽姿疏遊人之煩想不汪汪於千  
頃自泠泠於百丈寫星火兮初流涵珪月兮始上湛清  
華於古木於以交輝澄鮮彩於層空於焉競爽虛明莫  
映皎鏡無私處不爭而成德體自然以為資金風乍搖  
似易水蕭蕭之日木葉方落如洞庭娟娟之時映沈寥  
之遠天動悠揚之短晷與碧落而相合將清光兮乍起  
淨如練兮可名清濯纓兮增美儻朝於海知引往而納  
來如挈其竝可注茲而挹彼安彼皎潔利物含弘溢金

隄之晶晶窺銀礫而澄澄飛螢乍臨疑列宿之在漢纖  
鱗或躍若迎春而上冰豈清淮之可翫何靈溪之是矜  
則知沸潭無涌聞之於栗烈寒潭見底稱之於洞澈孰  
若積玄流當素節金鏡同朗冰壺共潔既妍蚩而照臨  
幸清通之區別

浯溪賦

宋 楊萬里

予自二妃祠之下故人亭之旁招招漁舟薄遊三湘風  
與水其俱順未一瞬而百里歛兩峰之際天儼離立而

不倚其一怪怪竒竒蕭然若仙客之鑑清漪也其一蹇  
蹇諤諤毅然若忠臣之蹈鼎鑊也怪而問焉乃浯溪也  
蓋唐亭峙其南嵒臺歸其北上則危石對立而欲落下  
則清潭無底而正黑飛鳥過之不敢立迹予初勇於好  
竒乃疾趨而登之挽寒藤而垂足照衰容而下窺忽焉  
心動毛髮森豎乃跡故步還至水滸剝苔讀碑慷慨弔  
古倦而坐於釣磯之上喟然歎曰惟彼中唐國已膏肓  
匹馬北方僅獲不亡觀其一過不父日殺三庶其人紀

有不斲矣夫曲江為篋中之羽雄狐為明堂之柱其邦  
經有不蠹矣夫水蝗稅民之畝融豎椎民之髓其夫人  
之心有不去矣夫雖微祿兒唐獨不實厥緒哉觀馬嵬  
之威垂渙七萃之欲離殪尤物以說焉僅平達於巴西  
吁不危哉嗟乎齊則失矣而楚亦未為得也靈武之履  
九五何其亟也宜忠臣之痛心寄春秋之二三策也雖  
然天下之事不易於處而不難於議也使夫謝奉冊於  
高邑稟重巽於西帝違人欲以圖功犯衆怒而求濟天

下之士果肯欣然為明皇而致死哉蓋天厭不可以復  
祈人潰不可以復支何哥舒之百萬不如李郭千百之  
師推而論之事可知矣且士大夫之捐軀以從吾君之  
子者亦欲附龍鳳而攀日月踐台斗而盟帶礪也一復  
葭以菴荒則夫一呼萬旗者又安知其不掉臂也邪古  
語有之披機之會間不容槎當是之時退則七廟之忽  
諸進則百世之揚解嗟肅宗處此其實難為之九思而  
未得其計也已而舟人告行秋日已晏太息登舟水駛

於箭回瞻兩峰江蒼茫而不見

漫塘賦

有序

宋

劉宰

張瑞衡謂漫塘叟曰余昨宦東州客有問漫堂之景者  
余無以應或又有徵圖於余者曰子漫塘里中人也寧  
無之余又謝無有既歸將與好事者謀之而游乎塘之  
上見景物之無竒游觀之無所難之可若何叟不對退  
而援筆為之賦其辭曰

東沿柳巷北屆蔬畦小溝環其南通川漫其西靡種靡



藝不耨不治葭蘆茁而映帶成行沙土潰而壅底為堤  
茶藜叢生蒲稗因依萑苕紅白錯如布棊爛乎若吳陂  
初按於彩陳粲兮若月宮更下於瑤池翠蓋亭亭芳氣  
菲菲鷺慣圓沙之宿魚便密藻之依蛙蚓爭鳴而鼓吹  
百萬鴛鴻來下而爛斑舞衣雲斷而霞散錦綺風平而  
月漾玻瓈茲實天壤之真趣有非世俗之可知亦有新  
齋臨乎水涯小橋斜徑矮屋疏籬雨未多而泥沒膝門  
雖設而草侵扉朽木慣宰予之晝寢青苔驚玉川之夜

歸仙舟自去誰為元禮高軒不來孰為退之叟之辭未  
畢瑞衡曰止余聞李愿安盤谷之居杜老喜浣花之寓  
彼豈玩志於物縱心逸豫盖以厭俗喧卑脫身遐舉要  
必有偉麗之觀幽閒之趣以凜雪其精神澄清其志慮  
庶白日可到於羲皇而宵夢足通於帝所况如吾子内  
絕意於聲色外忘懷於圭組為計已決歷年已屢而是  
塘也廣深雖媿蘇夫子之滄浪而僻遠亦殊柳先生之  
鈞鈿其隘也可闢其闕也可補胡不增其高而為基夷

其平而為圃畫舫浮深修梁跨阻嘉花美木之列植真  
館涼臺之接廡使鄰曲改觀兒童欣舞顧乃計失於因  
循事仍於莽鹵豈惟無以自適於一時抑恐由之貽笑  
於千古漫塘叟曰吁巢居知風穴處識雨頤吾與子雖  
同聲氣尚殊出處子寧規吾以目前之苟且毋寧怵我  
以方來之謗譽彼花迷金谷之園雪冷袁宏之渚淒涼  
釣瀨富哉郿隴試由今而視昔果孰去而孰取張子由  
是俛然而思釋然而悟曰子無俟於索言吾特從而戲

汝

雲夢賦

元

何克明

駕洞庭之靈艸覽熊羆之故墟偉雲夢之鉅澤控天南  
之一隅爾其雄跨大江延袤千里水瀟瀟其漸漬山籠  
籠而迤靡却五嶺瘴煙而莫近豈五丈秋風之可擬草  
木鬱其暢茂禽獸樂其游憩原田每每入獲未耜之利  
車馬鱗鱗歲芻蒐獮之備其產則橘柚菁茅竹箭金錫  
虎豹貌然可以應庭實軍容之需麋鹿魚鼈可以為乾

豆實庖之給實荊州之府庫亦中原之羽翼岳陽大別  
擅名勝於古今夏口江陵分形勢於區域當其煙橫北  
渚日暮蒼灣仙傳巨靈神游其間古琴鏗鏘寫幽怨於  
湘女釣天縹緲奏廣樂於軒轅水天一色落霞孤鶩風  
月雙清歸鶴啼猿岸芷汀蘭香溢靈均之離騷廣谷大  
川地壯弓虎之于蕃身歷茲土心馳往古奠我名居實  
維神禹當懷山襄陵之際任手胼足胝之苦及其雲土  
而夢作乂於是考圖而貢可數暨夫荆懲之詩不歌而

楚氛之惡是怙于以田獵于以耀武何涼德之不長終  
漢室之啓土有愚淮陰驕力跋扈致乘輿之鳴鑿烹良  
犬於得免信乎地不足以設險德終然之可據天眷吾  
皇奄有寰區雖茲澤之曠邈果見侈於雄圖嗟予忝於  
楚產期觀光乎帝都極鋪張於雲夢恐徒儕於腐儒吞  
八九於胃中曾不芥蒂請誦此語於相如志則未止於  
四馬高車尚無責之以上林子虛

雲夢賦

元  
陳誼高

覽東南之巨浸兮渺乾坤其浮浮此未足以盡荆之為  
數兮蹇將泝其源之流維九州之有澤兮羗荊州兮雲  
夢表二澤之橫亘兮跨江南北以相控原夫澤之為量  
兮水既潄而不溢匯衆流之交會兮自循道以秩秩若  
宇宙之再造兮揭禹功於萬年俾五行之攸叙兮乃迄  
今兮安其天吾乘流而橫其側兮極空間而深淵天莽  
莽而不盡兮河藹藹而含煙亂風帆之往來通巴峽而  
湘川縮青山之一髮兮結襄漢之袞延當春波之泛泛

兮捐四際於一區及寒濤之浸碧兮勢已殺而兩湖征  
鴻飛而沒影兮涵元氣於冥無舞魚龍之天矯兮雲垂  
垂而水立映殘霞之錯落兮祝融蒼茫而欲晡原桑麻  
之旆旆兮隰禾黍之離離岸蘭芷之菲菲兮芳洲繚其  
江離緬懷楚子之遊田兮佩明月而冠切雲排千乘之  
旌騎兮紛馳驟於水濱但知走獸之是獲兮豈得非熊  
以致君漢高之偽遊兮未必臨幸乎此中笑齊封之雖  
大兮終媿夫汨羅之孤忠塞天地於一浩兮居八九於



心曾洗往事之芥蒂兮乃北望夫清都睠雲夢於萬里  
兮奠南服於一隅其藪澤之所聚兮皆材用之所需決  
天下之疑兮有大龜之納錫用天下之武兮有磐楛之  
勁直成天下之禮兮况菁茅之生植豈無秉心以東注  
兮攄朝宗之萬一乃為之歌曰雲夢瀦兮流海土士楚  
產兮貢天府秋風兮策策洞庭波兮恍萬舞俯伏兮端  
門聽鈞天兮帝所

雲夢賦

元丘堂

緊東南之奧區維雲夢之二澤盪兩儀兮同開渺千里  
兮莫極為上流之淵藪跨大江之南北吐霧雨兮吸煙  
雲浮乾坤兮浴日月蓋其形勢汗漫風景蒼茫連淮通  
蜀亘荆控揚并包漢沔縣絡沅湘漫漫荻葦之岸漠漠  
菰蒲之鄉蔭煙林兮明滅浩雲水兮汪洋洲重洲兮掩  
映浦隔浦兮相望鴻鴈鳧鷖之所集狐兔麋鹿之所藏  
魚歌互答獵網成行樵牧彌野商賈連樯貨財之富聞  
於四方至若羽毛齒草樵榦栝栢菁茅竹箭之由產黃

金丹砂之自出雖僻處於遐陬實有資於上國是故楚子之所常獵漢高之所欲遊長卿遠慕而特賦太白來觀而久留少陵詠洞庭之上杜牧吟澤南之州至今騷人墨客之來往必為之徘徊而賡酬諸生有翰林主人者曰昔子虛詫齊以雲夢之事而見辱於烏有先生今而賦之豈欲為雲夢解嘲也邪主人於是馮高眺遠攬今撫昔臨風俯仰喟然歎息曰嗟夫子以為今之雲夢猶昔之雲夢乎非也吾聞古往今來否極必泰世運既

回地氣亦改昔春秋之季世如糜爛而波潰彼區區之  
齊楚各誇強而詫大惟田獵之是務惟原獸之是愛想  
雲夢於此時為生靈之巨害方今聖皇御極天下為家  
八紘一網四極一置游畋之事不動於念慮好生之德  
周浹於邇遐遂使羽毛鱗介自飛自走而雲夢之魚鳥  
如在文王之沼圃勾芡萌坼自生自育而雲夢之草木  
如在陶唐之暘谷加以菱芡彌望麻黍陰翳悉令蒐獮  
之場化為耕食之地是古之雲夢為民之病今之雲夢

為民之利也惜相如以俊逸之才不遇今太平之世雖  
知楚王雲夢之陋而反逢武皇上林之意况登高能賦  
可為大夫當宣雨露九天之澤為洗雲夢千古之污於  
是諸生欣然執翰操觚願鋪張今日之所遇起子虛烏  
有而告諸

田家坡賦

宋 孔武仲

登平岡以北望山石嶙嶙而青白非所謂兩鐘者邪遊  
氣濛濛以薄天非馮夷之所宮者邪洪濤巨浪號北風

者邪銀山玉城渺連空者邪余南歸而至此過鐘石之  
旁畔三江會而為一分浩聯屬乎天漢渺不可以槩舟  
兮凜驚肅其魂幹鳴兩槳以橫絕兮寄宿夕於南岸舟  
人相戒以不寐兮聽城鼓而宵半孤山岌其當前兮閃  
羣星之燦燦及還吾鄉甫涉旬日昔之川行今則陸矣  
昔之舟處今則屋矣欲輿而輿欲馬而馬欲翱翔乎城  
邑出馳驅乎垌野險阻危厲化為夷平蛟龍無所用其  
威兮江豚白鱉安得以縱橫行持一筇疲卧一石而渴

飲一觥安得長此處兮差優游以養生塗於人之所不  
涉兮耘於人之所不耕願謂僕者此何處也對曰是名  
田家坡去城十五里於時側日銜山松聲颼颼溪塘湛  
其微波兮梅花落而飛浮方旋轉而返轡悵莫克以淹  
留因援筆而成文聊以識乎茲遊

浮山堰賦

有序

宋秦觀

梁武帝天監十三年用魏降人王足計欲以淮水灌壽  
陽乃假太子右衛康絢節督卒二十萬作浮山堰於鍾

離而淮流湍駛漂瘵將合復潰或曰淮有蛟龍喜乘風  
雨壞岸其性惡鐵絢以為然乃引東西冶鐵器數千萬  
斤益以薪石沈之猶踰年乃合堰表九里水逆淮而上  
所蒙被甚廣魏人患之果徙壽陽戍頓八公山餘民分  
就岡壘未幾淮暴漲堰壞奔於海有聲如雷水之怪妖  
蔽流而下死者數十萬人初鎮星犯天江而堰實退舍  
而壞嗚呼異哉感而作浮山堰賦其辭曰

繫四瀆之並儷兮實脈絡於坤靈惟長淮之漫漫兮自



桐柏而發源貫江河以下驚兮拉泗沂而左奔走獍雷  
以赴海兮駕扶搖而薄山固元氣之宣節兮熄衆兆之  
災患粵蕭梁之服命兮抗北魏以爭衡信降虜之詭計  
兮阻湯湯而倒征依兩崖以受土兮羌合脊於中央捷  
竹菑石之不足兮又沉鐵以厭不祥袁九里以中峙兮  
截萬派之奔茫大隄屹乎如墉兮杞柳鬱其成行展源  
深而支永兮雖暫否而必通倏凌越而奔潰兮與蒼蒼  
而俱東若然犀之照渚兮旅百怪而爭道駢馬怒而噓

蹠兮虎蛟冤而相糾哀死者之數萬兮孤魂逝其焉游  
背自然以司鑿兮固神禹之所惡世苟近以昧遠兮或  
不改其此度螳螂怒臂以當車兮精衛銜石而填海潛  
梁人之不思兮卒取非於異代豈方迫於尋引兮不遑  
議夫無窮將姦臣取容以幸入兮公相援而欺蒙抑五  
材囚壯之有數兮特假手於憧憧系曰敦阜冠冥大川  
屯精氣扶輿變乾文運徒力頓漂無根潮波復故彌億  
年

河堤賦

唐呂令則

水以潤物飛梁載舟居信順動法謙處柔朝滄溟以委  
輸習坎德以安流善利為水涵育乎萬族極深不測灌  
注乎九州壅之則有備無患決之則致敗為憂先設其  
防以遏奔潦興版築護衢道惟精惟一是經是造其奮  
鎚也齊叫以雷震其揮鍤也連刃以霜皓蠹長堤其若  
雲岌修岸其如島何固護之克壯息奔突以永保既夾  
植於菱蓮又實緣於萍藻雖興役賦而一勞永固牛馬

由其望辨樓船可以逕度清深鏡澈時升曳尾之龜左  
右人稀每帶銜魚之鷺行旅於是乎無虞耕耘於是乎  
知措夫水可以為人之利堤可以防水之溢堤修則中  
國無憂水敗則下人多恤亦由人之為政政成人之逸  
政或不成姦詐以出則河堤之義取類非一可以合人  
之安危可以喻政之得失凡百在位慎乃終吉別有沉  
淪戒忤飄飄衢術幸登涉於河堤冀霑濡於瑣質

沙堤賦

以隱以金推樹  
之青槐為韻

唐

韋肇

遵大路乎新謀倚善人之廣運沙之積也得禦濕之宜  
堤乃名焉審用功之分爰謀爰度是築是隱使夫晴靡  
澆确之煩雨無塗潦之窘若然者施之城闕豈但三條  
之通用之郊坰可以千里而近伊功足紀斯美奚擬臺  
或虧篋我終始兮無然山不讓塵我包含兮亦爾應物  
兮寧倦安卑兮詎恥俾時行各得其所由故日用不知  
其所以君勿謂泥滓之賤君其乘弘益之深高而不危  
仰諸侯之殊化直而能正定志士之夙心何止禦浸淫

而為岸或當披墮地而揀金其處也周帝城之內徒有  
羨於瑤池其堅也雖衆人之力固自得於金椎亦由道  
存而命舛天縱而非師是以遽奔衝應馳驚洞萬戶兮  
旁啓紛九門兮爭赴往來相接見軒蓋之成陰蹊逕自  
開何桃李之足樹役無妨時利莫尚茲豈衢於踰且以  
夫大為防也能保其固匪同中聚而兩之仰對高闕兮  
熒熒夾植喬木兮青青無偏無頗庶託情於王道不騫  
不圯長委質於地靈願得乘御輦蔭宮槐敢邀功於捷

徑期展效於微埃徒以為臨曲沼登高臺誠不如賦沙堤之盛觀足以騁作賦之才

良干竭賦

有序

宋吳儆

紹興二十有七年秋八月詔以樞密院檢詳潘公刺新安公至問民所疾苦與利所宜興者會有以良干竭久廢請復之公為庀司鳩徒授以規畫閱三月竭成先是附城之東平原延袤數十里民障溪引水溉以為田收至畝一鍾兼并家遽富溢至有以米藉地為夸侈者未

幾竭以震圮積五十年莫能復復之輒震由是城東之  
田多荒民多流亡存者兼重賦病之久矣至是興復如  
初而天變亦息歲大稔民益德公以為非公之誠有相  
之者莫能興是役也幕府從事屬邑之吏相與作為歌  
詩記序贊頌論述甚備公既以言去而民益思之延陵  
吳某曰是可賦也其辭曰

道新安而東駕遡連山以北馳忽原田之晻靄被木黍  
之離離紛茂實之垂黃穉綠蔚其涵滋軼吾車以延望



渺雲委而風披，遵蘭皋之決瀉，兮驚長虹之委蛇，引鄭  
白之駛流，兮決龍首之湧波，放平野以四溢，兮勢同挽  
夫天河，伊洪源之所自，兮浩漫漫之平川，屹中流之底  
柱，兮擁萬馬以莫前，捷木囊石山積而阜亘，兮偉橫海  
之鯨鱣，醜餘波以殺怒，兮駭濤江其上，奔飛流濺沫騰  
蹕噴薄，洄洑而鯢旋，兮沸匡廬之瀑泉，積奔淪於上流  
兮，餘委漫其稽天，鬱蒼蒼之一色，兮蹇心惕而神寒，粵  
有老漁飛桂楫，濯清輝登舟揖，客顧而言曰，客亦知夫

此陂之興廢乎自陂之西達於東城平阜衍其如席錯  
隴畝之縱橫渠陂水以灌之率一畝而一鍾彼豪右之  
肆貪兮連阡陌以為雄席羨溢之餘貲兮委而履之地  
也肆皇天之霆怒兮涸其富之源也惟絕流之巨障兮  
勢盤石之固也何一夕之雷雨兮曾毫釐之不遺積五  
十年莫能復兮或復焉輒震之惟茫茫之沃野兮昔杭  
稔之所宜藜莠莽其亡際兮叢薄蔓其相依賦名空存  
田榛榛其既蕪兮縱鞭撻焉奚為幸使君之褰帷兮哀

此民之無祜乃訪故老乃命官吏乃泣乃度乃經乃理  
糗糧畚鍤土石材葺儲之既具取之有所然後集農工  
而授之若靈臺之始附計者度者畫者指者負者運者  
餉者帥者或引或啓或窒或決或培或鑿或築或增謹  
趨兮如雲橐鼓兮弗勝考龍火兮戒事閱三月而告成  
凡水積分成淵渠決兮如雨浩源委之無窮極陸海之  
饒富皆使君之膏澤也今將尸而祝之社而稷之不足  
以為公之報治金伐石垂耀無極不足以慰民之思伊

君門之九重兮儼虎豹之鬪肩孰列誠而上控兮無遽  
奪乎馮依若是者其可乎客曰吾聞君子之於民也施  
之而不期其報利之而不居其成矧爾使君國之股肱  
將利澤乎四海豈下邑之能淹也哉漁者俛而不言仰  
而長吁鼓枻而去

石淙賦

明 李東陽

聳山骨兮峭嶭中潺湲兮水聲初濺涓以汨滴忽砰湃  
兮鏗鉤或在遠以疑近恒自昏而徹明感天機於一觸

衆籟為之不鳴信江南之絕境乃萬類之至精彼瀑布  
兮可擬曷蹄涔之足稱爰有三南居士比象引義取石  
淙以為名客從湖南而過者曰此非洞庭之波乎碧浪  
千頃青山一螺揖靈秀於衡嶽激清風於汨羅昔予之  
既排旣屏來遊而來歌興懷於某水之丘寄跡於北山  
之阿校風景於毫芒繁孰寡而孰多居士不答如茲淙  
何又有自滇南而來者曰此非昆明之漪乎平地仰噴  
從天下垂建長江而直瀉指瀚海而同歸昔子之乃祖

乃父生斯聚斯倏星移而地改方挹彼而注茲訝江山  
之不可復識抑疇是而疇非居士乃憮然而歎曰嘻有  
是哉吾固知石之為石淙之為淙也吾方手拊鏜鞳耳  
聞春撞應噫氣於大塊引希音於清商挾涼飈以助爽  
與皓魄而爭光達大觀於無外諒至美之難雙蓋將濯  
纓乎萬里之流振袂乎千仞之岡若乃東山在吳以象  
舊邦東坡在黃遂名四方彼二東者之偉蹟豈三南之  
敢望且夫石者吾知其為堅淙者吾知其為激匪徒觀

物以適懷抑亦將身而比德蓋將礪我粗鈍蠲我宿癖  
滌塵垢於七情漱芳華於六籍嗟人生之有涯見道體  
之無息彼羣分而類聚何物非兮太極殆不知石之為  
淙淙之為石也於是二客攜酒與琴遊於淙上班荆雜  
至林歌迭唱北南俱失賓主皆忘慨聚散之殊塗顧行  
藏之異尚三人者各適其適渺不知其所向也

井賦

晉  
郭璞

益作井龍登天鑿后土洞黃泉潛源薦臻瀉瀉涓涓幽

溟圓渟澗洞深玄爾乃冠玉檻甃鱗錯鼓轆轤揮勁索  
飛輕裾之繽紛手爭鶩而互搦長縲委蛇以層縈兮瑤  
甕龍騰而灑激乃回澄以靜映狀炯然而鏡灼挹之不  
損停之不溢莫察其源動而愈出信潤下而德施壯邑  
移以不改獨星陳於丘墟兮越百代而猶在守虛靜以  
玄澹兮不東流而注海氣霧集以杳冥兮聲雷駭而瀟  
泐

井賦

晉  
孫楚



倚崇丘以鑿井兮臨斥澤之滛洿若行潦之滓濁兮靡  
清流以自娛乃喟爾而有感兮率鄰左之數夫脈厥土  
以興泉兮登甘醴於玄虛體象圓川下貫五仞幽泉騰  
涌津澤傍潤抱甕而汲不設機引絕彼滛飾安此樸慎  
俗尚其華我篤其信既處澀而不緇又磨之而不磷雖  
矢志而無妄實游心於大順渴人來翔行李是賴輟耕  
息肩不期而會沈黃李浮朱柰雜狸首之斑如飛清塵  
以泐汰枕玄石以盥漱喜遨怡以緩帶

井賦

晉江道

穿重壤之十仞兮構玉甃之百節營之不日既汲既滌  
潛流昭昭寒泉冽冽挹之不損滴之不充納而不處其  
有與而不匱其豐先王借象以辨義君子擬澹以自綏  
神龍來蟠以育鱗列仙一漱而雲飛

井賦

唐呂令則

體羣物以舉要多井功之大成灑元氣之洪液翕泉源  
之至精冥下坎上創庖羲之畫象鍤壤畚土喜伯益之

初營澹其味澄其清同不變以育德履剛中而益平汪  
濺津潤兮物得其利沃盥盥漱兮人賴其生是以養而  
不窮則取之而逾出止而有分即舍之而不盈故啓幽  
人之三徑首先王之五行若乃寒漿是汲美人至止玉  
甃駢固銀牀沓起轆轤宛轉以旋目素綆逶迤而度趾  
羅袖互引扇皓腕而生香金駢數泉曲纖腰而貯水雖  
騰突於溜源不混淆於泥滓汜至而緇瀉已就猶尚潛  
聲而駭耳濯之既潔漱之則美何自下而汲上與溪壑

而殊旨故其旁搜詭迹遐評殊見土精攸出惕羶羊之  
怪竒缺角已沉鬱神龍之氣變金色化粥山形溜殿源  
洞德陽之兵勢匿江陵之縣秦分星聚邛都火煽漢皇  
歟應於雲飛葛公一窺而電熒斯故潛怪之所蓄洩吾  
不可得而言遍徒美其括坤之靈包坎之德往來井邑  
用之不忒秉虛澹而能施守卑靜以自得終勿慕之有  
孚保元吉而無惑苟在時而不泥庶當潔而見食

井賦

唐  
高無際

若夫羣萌異質品物殊狀俱擾擾以祈生各營營而自  
養莫不濟時為要利物為先法星文而鑿井窺卦象而  
開泉火舜垂功於茲日龐君著績於此年資坎德而成  
潤播靈液而澄鮮潛流洞澈細影凝冽不以處幽而易  
清不以居深而變潔於是雕以玉甃飾以銀牀棲永康  
之瑞鳥呈魯國之羴羊持素綆以就汲引金鉞而未央  
爾其紅桃春映若新妝之臨寶鏡朱李下垂疑明星之  
列玉池喜丁公之得利懿嫫母之來窺至若鐵騎雷駭

劍士雲列燕山之陣欲舒疎勒之泉已竭旅客愁聚征  
夫思咽應下拜而將飛表忠臣之高節此甘泉之神用  
也至若冬凝溫色夏湛寒輝既不偏滋於隆重亦不減  
潤於卑微飲之咸濟汲之無違轄將投而鳳沒錢始出  
而鳧飛此甘泉之普施也若乃冲融表裏類彼君子鑒  
之無窮挹之何已悟帝王之無力學仁者之往視徘徊  
疑度思盡美矣

井賦

以清淑過  
時美為韻

唐

張耀

原夫井之為德以不變而居貞既成形於方載亦列象於圓清潤下之功爰修之於六府習坎之義則配之於五行惟斯井之肇作實伯益之所營爾乃玉甃爰起銀牀斯立窺尋丈以惟深覘清泉之始及青梧下映泛桂葉以搖揚素縷高懸弄銀餅之出入光洞徹而綠止影飛翻而為汲且其盥之取新滌之去故體清通之惟審知應物而無忤居上善而且平挹清規而可遇庶乎鸞鏡熒煌而可比鳳池皎潔而為喻別有前臨紫殿俯映

丹墀上棟下宇繡栢文楣意者豈非至尊尚恬澹而取  
諸動善時而已哉懿夫粉署清華飛禽載止對仙郎之  
章奏近尚書之劔履竊自羞嫫母之陋姿鑒清瀾之眩  
美

浪井賦

以王者清淨  
則出為韻

唐  
王起

洌彼寒井契於聖王不因鑿以成質每自浪而呈祥涌  
呀呶鼓靈長比醴泉之自出異海水之不揚吾君是時  
清八區肅諸夏寶出於地符呈於野伊井有浪焉乃瑞



之大者爾其呀豁百尋之表洶涌重泉之下狀靈濤之  
潛洩匪冽風之是假淪連不盈觸搏恒驚窺坎窞之底  
有江湖之情積而有潤於下混而不傷其清窺則澄澄  
乍玉甃而同色汲之浩浩激銀竚而有聲鮒飛鱗而不  
定羊在缶而皆傾泊夫列宿參差曉月韜映搖珠彩而  
增潔涌金波而轉淨湯湯下激不施屏翳之功洶洶潛  
驚詎假陽春之詠然後駭四海之目垂兆人之慶伊厚  
地之發祥實大君之作聖彼青桐素纒之飾玉檻銀牀

之盛皆人力之所成固神造之不競宜乎光瑞典苞坎  
德不藏於冰不蓄於墨惟波獨涌惟滌可食奉我皇之  
飲俾上善以為心戒我皇之窺必臨深以取則知并非  
浪不貴乎成質浪非井不彰乎聖日比井而王化其清  
比浪而王心不溢稽休明而合應將汲引而無失彼堯  
人鑿而飲漢將拜而出未足以彰其帝功而較其靈術  
者也

義井賦

有序

唐  
呂令則

鑿地生泉之為井施人不倦之為義無濟往來存乎惠也置當衢路仰無私也皎鏡清虛尚其潔也三德既備萬物是仰井乃無心義惟我謀當衢鑿井稱物並施酌而不竭奉衢樽之化焉見義不為恥也遇善莫書過也義既行矣文在茲乎賦曰

夫地脈伏泉天文垂井式觀象而遂鑿雖暫勞而功永深不過於數仞用有要乎萬頃風動無波物對生影勁陰殺節挹之而彌溫炎旱蒸天探之而逾冷况地接一

都之會邑居狹俗之境川流雨驟車馬於焉往來風舉  
雲搖帝王由茲行幸魏主罷指梅之策隰朋息尋蟻之  
請豈非人有其願地不藏靈色湛湛以天碧嵌陰陰而  
晝冥高風始秋泛落桐之一葉太陽既沒映長天之數  
星因注水而暫益縱改邑而常寧素綆下懸映垂冰之  
晶晶銅餅上汲滴淺溜之泠泠清泉既汲白日可見豈  
獨兼濟行李抑亦取給茲縣隨所求而皆足豈有殊於  
貴賤若乃連巖之曲闥閣之前雨苔環合生其上露桃

翁鬱植其邊殊季氏之有缶異疎勒之無泉入夜雲開  
涵長河之短直向晨霧歇映大天之小圓玉瓿護崩誰  
識下無禽矣銀牀防墜不聞中有人焉乃有王國征人  
奔星驛騎或注情於故櫪或銜悲於遠寄飲之則長鳴  
而忘其苦辛酌之則充量而欣其普施雖一勺之蓋鮮  
亦懷恩而感義竝之罄矣既虛來而實歸爾牛來思亦  
滿腹而受賜故知理邑者賢濟人者井揚聖人之道用  
而不竭守君子之德澄而彌靜鑿飲忘帝王之力汲用

嘉仁明之境儻見惻於莫食庶微功之得省

枯井賦

唐闕名

粵若天生五材兮一不可棄水包六府兮萬人攸利汗  
樽杯飲兮變其淳朴鑿井汲泉兮興其繪事六十四卦  
兮表其名二十八宿兮列其位伯益創而功立重華浚  
而德備故有神丘玉檻仙苑銀牀浪華浮潤醴泉味芳  
永康則金精化鳥曲阜則土怪成羊感至誠於漢將通  
瑞氣於吳王若乃懸縞下垂抽餅上出窮百丈之幽秘

極九重之邃密由中夏而浹外區自帝王而周庶匹接  
壤鄰甸駢閭比室咸賴此以資生必待斯而養質隨大  
小而周用任多少而取實環終始兮歷古今積歲時而  
繇月日湯七載而無減堯九年而不溢一家曠兮靡寧  
寸路虛而有郵運其功兮信廣收其利兮焉畢及夫欄  
傾甃毀土陷泉沉滋液中耗汙泥上侵古桃顛顛兮無  
色枯桐零落兮罷陰霜霰積兮空園冷荆棘攢兮荒徑  
深昔時之所趨挹疇日之所窺臨皆指新而競往罕存

舊而來尋豈惟見嗤於射鮒諒亦興歎於無禽如使崩  
壞重修堙泉更潔澄汰汙滓鑿觀清冽擬畫處之蓮房  
除哭者之茅經近類齊人之井遠分夏后之穴若澗溪  
之始注猶泛濫之初決當給養之不窮寧酌甘而先竭  
辭曰有通有塞兮道之恒時用時舍兮業方弘疏而洩  
兮甘潤騰壅而竭兮汙泥增彼幽涸兮如重啓濟窮渴  
兮良所能

耿恭拜井賦

以感通厚地神  
啓甘井為韻

唐

羅讓



昔耿恭躬受斧鉞志清煙塵奮長策以討虜由至誠而感神於是堅疎勒之壁依澗水之濱據以為備期乎來賓既而匈奴奔敗而伺隙澗泉壅絕而不至雖礪乃戈矛而渴我將吏遂乃處孤城而穿井窺重泉而闢地深餘十丈曾無一勺之多職長千夫幾敗三軍之事因不見其成績憤將達於精意俄而外整衣服中懷果敢推赤心於神祇禱素液於坎窞拜未及起叫天以無辜言未及終觸地而有感閱其質若俟仁人發其蒙俄成澹

淡濯濯執熱祛除積慘明矣大漢士卒所以歸心惕爾  
羣胡君長於焉破膽乃知以精誠及物何物不單以忠  
烈靖難何難不戡自我而來且見不虛其請由中而出  
孰云先竭其甘是日也飲人如醴帝教勃焉而光啓蕩  
寇之功將畧忽爾而玄通如爰如焚既冽清而可食一  
拜一起遂感沸而無窮斯乃道靡不弘虛無不有諒歸  
之於感激豈間之於博厚所以貳師至境決泉脈於喬  
嶺校尉臨邊發水源於智井疲羸因之盡濟狂孽由之

遠屏則知在物無必至誠有字如聲之響如形之影

井渫不食賦

唐闕名

有浚其井當時未知功已成於岸甃道尚失於餅壘潤  
氣寧發潛源且卑此遇鑒明而足用彼將心惻以何為  
蓄利雖多含清信久幸可溉於鼎鑊惜無施於綆缶塗  
泥既去方應用以虛心汲引攸難希有成於假手况復  
桐色無點桃陰不生思輒輸其涓滴望無發於澄泓同  
美玉於斯將沽有待比嘉肴不食其味焉呈蓋由混衆

難分處幽多棄盥漱無及空知冽彼下泉顧盼可期猶  
謂居之善地淵然日久望是光臨懼以名徵想貪泉尚  
酌登諸薦品豈行潦獨任屬時非於疎勒惜地異於漢  
陰願先竭以當仁期分甘苦俟一窺而見愛焉測淺深  
噫夫穿鑿多勤鑿臨斯及佇將成於勿幕恐致變於改  
邑因以纖綆可施一勺可挹實有備於烹飪之日惟夫  
深知而用汲

水賦

晉

王彪之

寂閒居以遠詠託上善以寄言誠有無而大觀鑒希微  
於清泉泉清恬以夷淡體居有而用玄渾無心以動寂  
不凝滯於方圓湛幽邃以納汙泯虛柔以勝堅或泆浪  
於無外或纖入於無間故能委輸而作四海決導而流  
百川承液而生雲雨涌凝而為甘泉

水德賦

唐  
梁洽

大哉乎茲水獨靈長以利貞分位象於八卦得柔謙於  
五行混之不濁流之不盈蓄恬澹以凝潤含虛無而洞

清其近窺也若冰鮮與玉潔映曙空而內澈其遙視也  
如雨罷而日晶澄遠氣於初晴德之深與上善而均美  
讓之大居下流而不爭處地為泉源則江漢朝宗之義  
立在天為霧露則陰陽燮理之功成辨涇渭於九流雖  
衆不雜察蚩妍於萬象在隱皆明亦何異翹翹邦彥濟  
濟朝英作我吏部為周亞卿昔掌地官其守土也能審  
今來會府其應物也以精迴廣照之能比其妙識以無  
偏之志喻此持衡故得自陝以東更仰知人之鑒普天

之下皆稱如準之平則有登舟未涉處轍未停遊子隴  
頭嗚咽斷腸之奏知音席上傳聞盈耳之聲儻為廣由  
中之德流潤下之情則所謂清通之一過可以濯吾纓

水彰五色賦

以渥彰彰明必資乎水為韻

唐

梁洽

善利無方莫先乎水識當潤色之際必取務滋之旨黑  
黃蒼赤皆類其激物黼黻文章咸本而資始德既洽於  
濟物色且叶於通理自得玄之又玄何謝美之為美於  
以增曄曄於以散煌煌浴飛翬於陳寶浸社土於徐方

染氏繁而衆彩繁糅績人因而品彙咸彰博我以文不  
獨專於潤下用而不竭將以效其靈長原夫被物如濡  
霑顏載渥狀暮山而翠疊法朝景而霞駁遠同墨氏類  
素絲之屢遷尚想蜀江嘉貝錦之斯濯飾袞衣而煥爛  
成繡服之歲蕤何采章之不昧由浸潤之所資漸以化  
成能令素以為絢期於敷衍孰謂涅而不緇既得色斯  
舉矣亦可狎而翫之不假濯於滄浪寧同資於碧海凝  
瑞霞之炫耀發慶雲之光彩寫補天之績鍊石之資必



該圖應聖之祥威鳳之儀咸在佐益丹而惟其深矣當  
後素而不曰白乎流濕之光允若受采之時是須且比  
成人之美實同因物有孚助其言而載隨炳其用而無  
必乍成藻火之文幾變素紉之匹榮光可愛初謂出河  
之符備色咸宣更入夢江之筆先王所以因而立旨喻  
以相成含章而其輝未著發澤而其道彌精儻不苟於  
體用庶可致於文明

止水賦

以清審洞澈  
涵容為韻

唐

劉清

觀乎太古之初乾坤定列有坎方一德之大成江河四

瀆之別注仙海以環流度星橋而靡竭立體清靜舒光

朗澈觀五行以獨舉潤萬物而齊悅豈惟以善下之故

長應流行抑亦能遇坎則止以竭為平居荒野而不動

合寒虛而自清晝則煙雲亂出夜則星象羅生若乃湖

稱青草澤若雲夢淺深滌滄表裏寒洞當朱陽之夏晚

遇白露之秋仲紫關之鴻鴈飛來綠浦之蓮舟風送既

能止而利物所以歸之者衆亦有鳳凰之沼明月之潭

每澄流於庭院常不注於東南蒙寮窠之玩洽渾琴酌而相參以遊以賞如液如涵若英賢之取則類貞咸之是湛屈夫玉宇初晴風颺載寢籠碧天而似鏡展紅霞而若錦納衆影而不遺比羣情而特甚用使至人觀之而心察智者樂之而情審達士愛而欲臨高節聞而願飲復乃養龜鶴藏魚龍怪石積明珠重虛以受物謙而克從有一人兮充賦每咨嘆於澗松飾清顏而自肅希止水而今逢則知無美惡以畢鑒豈徒取乎矯容

止水賦

以清審洞澈  
涵容為韻

唐

王泠然

嘗聞神心保正天道害盈漏卮添而復出歌器備而還  
傾豈若茲水居然可名既混之而不濁又澄之而不清  
時止則止時行則行峻隄防則其源見塞開汲引則其  
道能亨安波不動與物無爭如方圓之得性何寵辱之  
能驚故為國者取象於止水使其政公平為身者亦同  
於止水使其心至明至察可尚柔謙何稟思遠道則一  
葦能抗守貧居則一瓢可飲接下流則卑以自牧鑒羣

物則寬而能審誠用之而舍之在去泰而去甚水之為德也長水之為功也衆散成雲雨畜作潭洞浮芥則傲吏措杯種瓜則幽人抱甕無朝夕之出納有飛沉之狎弄徒觀其深虛見底咫尺宜探千流並入萬象皆涵搖樹影於青岸落山光於碧潭其仁可以濟物其義可以激貪既而壅之不流蒙則未決照春物而畫屏相似映晴空而明鏡無別雨來而圓點亂生風靜而長波自滅任天時以開閉隨王澤而盈絕受涓滴而逾深處水壺

而更澈書云視水責影能見形容視人行事能知吉凶  
政煩則人擾水濁則魚喁夫子欲精神而不惑俾榮利  
無繫於心曾比浮雲之於我觀止水而為容兀兮若枯  
木坐忘澹兮若虛舟見逢正道未遠斯言可從儻不遺  
於射鮒希有便於登龍

鑒止水賦

以澄虛納照遇  
象分形為韻

唐

呂

溫

水止矣靜之其徐物鑒矣久而益虛既無情於美惡又  
奚議夫親疎委質由來所期乎上善同利忘筌已悟寧

惠乎至清無魚若乃迴塘月皎高岸環合泥滓湛而自  
沉金沙炯其不雜同道德以虛而受異川澤唯汙是納  
有斐君子此焉明徵氣隨浪息心與源澄端形赴影如  
木從繩其表微也挂金鏡而當晝其索隱也隔玉壺而  
見冰爾其色必洞澈光無滉瀟不蒸蒨鬱之氣不激潺  
湲之響百丈在目千仞指掌惡每自乎中見美實非乎  
外獎鑿形之始方似以身觀身得意之間乃同求象忘  
象觀其下倒星漢上披煙雲守其常而性將道合居其

止而物以羣分君鑒之以平心臨下必簡臣鑒之以勵  
節在邦必聞妍蚩無形兮惟人所召物我兼進兮水無  
不照庶士以之洗心至人以之觀妙豈比夫流若激矢  
波如建瓴不含晝夜爭輸滄溟徒乖躁靜之理莫辨真  
偽之形者哉邦家以道為止水鑒有餘裕羣形鱗集萬  
景雲附濫巾竊吹者十手所指研精撫實者千載一遇  
夫如是姑自攝其威儀亦何憂而何懼

鑒止水賦

以澄虛納照過  
象分形為韻

唐

張仲素



水可取鑒人能就諸將審己以徵實必含形而內虛其止也靜其清也徐方湛兮而皎鏡異汚彼而淪胥符上善之心自多弘納見無私之狀臨或躊躇資坎德之深矣諧至人之淡如當其曉日增鮮光風未度既清冷以爰止持炯戒以為喻等濫觴之猶蓄何一杯之是措諒善惡之咸觀必形影之自遇豈獨無當五色空涵衆文伊吉凶之肇起如動靜之潛分俯而窺似神交之澹泊默而察若靈化之綢緼且義叶養蒙道涂觀竅洞虛無

以責有在清明而惟肖心不同也常稱厚貌之疑鑑之  
精兮未若重泉之照辨妍蚩而無失固潔著而為妙斯  
所以田巴覽之而獨悲陸雲觀之而自笑若乃芳塘始  
啓白水初澄有美人兮方覲坐曲岸而情凝毫髮已分  
想沉姿而映藻清華不動見浮彩之生靈是知聲有往  
而必復者謂其響答水以止而能鑒者謂之冥合方取  
則於川渟孰混歸於海納此亦紀人事垂正經庶在觀  
身而責影豈徒品物而流形今則萬頃方臨羣容在掌

隨方圓以見意在清通而賦象苟明鑒之不遺願飭躬  
而是往

鑒止水賦

以澄虛納照遇  
象分形為韻

唐

王季友

鑒於水者不在於廣大而在於澄渟奔流則崇山莫辨  
靜息則纖芥必形故能任人倫之巨細隨物色之丹青  
皆一鑒而洞達若三光之出冥因見底之清成照膽之  
朗以無心而應物皆潔已而呈象如白日之輝輝無孤  
蓬之振盪馮虛之狀信有妍而有蚩閱實之明固無偏

而無黨若乃仙井舊滌華池既瀦中無浴鳥下絕游魚  
疑金鏡之湛寂若琉璃之至虛當其來見威儀之酷似  
及其去無朕迹於淪胥向使潺湲不息噴薄長住將沃  
日而騰虹或因山而瀑布遭駭颺之歛起值潛蚪之交  
驚雖有清明之本質豈能使形影之相遇是知專而靜  
可以居要明而動亦不能照斯大道之指歸豈常情之  
感召得懲躁之為誠知飾容之惟肖人觀於水既定而  
後詳水鑒於人當止而為妙照其美也非所愛照其惡

也非所憎不分明於有位不掩映於無朋諒可移性俾  
居於正直豈懷鑒貌獨貴於清澄想夫煙雨初霽泥沙  
不雜明看皎練止若冰合忽形來而影見類聲往而響  
答在良賢而暫窺宜陋軀之愧納今者貞清特異穎耀  
前聞雖萬形之森列終一鑒而區分

觀秋水賦

唐尹程

乘秋日之遊豫縱竒觀於長川惟秋水之清泚宗大壑  
而潺湲波浩蕩而不極影澄澈而彌天波沉馬色類真

人之雲度岸迷牛影疑織女之河邊柳浸影而如卧萍  
隨流而似牽鳧帶藻而聲澀魚亂流而水圓晴霞晚鋪  
如漢江之濯錦夜月初上若織鈎之映泉乃與斷金之  
好連璧之友矜壯歲之紅顏怯衰年之白首效淡水之  
密契就河濱而置酒惜素節之彫荷歎嚴風之入柳况  
夫澄淡逶迤涵空寫淨符老君之上善同至人之不競  
處下不辭其垢濁攻堅豈難乎流盛星光夜照如臨剖  
蚌之珠菱影朝開似照盤龍之鏡爾乃長波瀕洞洪濤

泛溢晴天淨而空鮮夏雲臨而峯出照鄒忌之蕞貌鑿  
陸雲之笑疾遂有感於莊篇託微言於拙筆

空水共澄鮮賦

唐  
張嘉貞

空之為象也本乎天水之為德也本乎泉上善之人方  
其性真化之客愛其玄清虛而隱性含受而無偏因高  
下而臨照故能共於澄鮮誠大明而盡善實和光如可  
憐爾其皎潔清泚空色懸於水底分明昭曠水光積於  
空上玲瓏晶液託九霄如染翠澈千里而含

碧微風共息含晴影而湛然兩日俱生弔長輝而相射  
表裏如一容象難尋涵泳游鱗若迴陵而上出聯翩度  
鳥疑戲沙之下沉為當物將類於迴覆為是人自惑於  
闕臨竟未能縷列於疑似分別於空水玄之又玄美之  
逾美




御定歷代賦彙卷二十九

謹案第三十頁前五行辭曰按文苑英華注辭疑  
作亂

第三十四頁後劉清按文苑英華注開元五年登  
科記第十三劉廷玉至第十七劉嶷無劉清名





總校官庶吉士臣張能照  
校對官編修臣楊壽楠  
謄錄監生臣瞿秉虔